



**Inuussutissalerinermut uumasullu nakorsaanut oqartussaaffiup tiginissaanut alloriarnissap tullia suussanersoq pillugu apeqquteqaat aallaavigalugu oqallisissiasatut siunnersu**

(Inatsisartunut ilaasortaq Aqqalu C. Jerimiassen, Atassut)

Qujanaq Inatsisartunut ilaasortaq Aqqalu C. Jerimiassen siunnersuummut.

Kialluunniit qularutigissanngilaa, Demokraatit namminiilivinnissamut kissaateqarnerat, aammalu ilungersuutiginissaanut piumassuseqartugut. Kisiannili eqqortumik tulleriissaaraluta sulisariaqarpugut. Siullermik Namminersorlutik Oqartussat iluatsilluartutut ingerlanneqarsimasoq takutittariaqarparput. Taassumalu kingunerissavaa, oqartussaaffippasuit naalagaaffimmiit akisussaaffigilernissaat oqartussaaqataaneq annertusarniarlugu.

Oqartussaaffiit angerlaassorneqarneri naalagaaffimmiit ukiorpassuarni uninngasimavoq, taassumalu kingunerisimallugu, maani nunatsinni oqartussaaqataanerup sumiginnaraluttuinnarsimanera. Uggornarpoq, pissuteqavissorunarporli partiit naalackersuisooqatigiit inatsip tunngaviusoq pillugu sulineq sallitinniarlugu qinersimammassuk uffa, taanna suliaq oqartussaaqataanerulernermik kinguneqartussaanngitsoq.

Tamanna tunngavigalugu ajunngilluinnarpoq, Inatsisartunut ilaasortaq Aqqalu C. Jerimiassen maannakkut aammaarluni inuussutissalerinermut oqartussaaffiup tiginissaanik oqallinnermik aallartitsiniarsarinera. Taanna oqaluuserineqaraangat amerlanerussuteqartunik isumaqatigineqartaraluarpoq, tiginissaa piareersarlugu aallartittariaqartugut.

Demokraatit tungaanniit ilisimaneqareersutut isumaqarpugut, oqartussaaffiit tamarmik naalagaaffimmiit tiginissaat piareersarlugit aallartittariaqartugut. Taamaattumillu arlalinnik suliniutissanik siunnersuuteqarsimalluta, suliniarnermut siursaataasinnaasunik. Siunnersuutigisimavarput, oqartussaaffiit pingaarnersiorlugit allattukkamik suut naalagaaffimmiit iluaqutaasussamik tiguneqarsinnaanerannut nalunaarusiortoqassasoq. Nalunaarusiaq taanna annikinnerpaaffimmini oqartussaaffiit ataasiakkaarlugit tignerisa aningaasatigut kingunissaanik imaqassaaq aammalu oqartussaaffiit tiginissaannut piffissaliussatut pilersaarutunik pivusorsiortunik imaqassalluni.

Taassuma saniatigut siunnersuuteqarsimavugut, naalagaaffik suleqatigalugu nalunaarusiamik sanasoqassasoq, ersarissumik oqaluttuartumik, piginnaasat sorliit, oqartussaaffiit ullumikkut naalagaaffimmiit ingerlanneqartut tiguneqartussat ingerlanneranni pisariaqassanersut. Nalunaarusiaq taanna piginnaasanik ineriartortitsinermi pilersaarummik imaqassaaq, qanoq ililluta uagut Kalaallit Nunaanni oqartussaaffiit taakku ataasiakkat nammineq ingerlannissaannut piginnaasat pisariaqartinneqartut, pissarsiarinissaannut, qulaajaasussamik.

Taakku siunnersuutit maani Inatsisartuni akuerineqareerput, maannakkorpiarlu utaqqimaarparput, nalunaarusiat piareernissaat. Isumaqarpugut, taakku iluatinnaatilimmik sakkussaassasut pitsaanerpaamik



isummernissamut tunngaviusussatut, qanoq aamma qaqugu taakku oqartussaaffiit angerlaannissaannut.  
Aamma inuussutissalerinemet tunngasut.

Tassalu Demokraatit oqallinnermut isummersuutaat.